

AMAMA MIREN LORE

Doinua: "Mahai baten inguruan"

1

Urbasa zabalean
zer ikusi dodan
dinotsut behingoan:
gaztanondo lehorra
loraldi gozoan.
Lehor zaharra loretan
ikusitakoan,
amama Miren Lore
sartu jat gogoan;
loreontzi bat dozu
bere zahartzaroan.

2

Maitasunak baditu
milaka kolore,
zein baino zein hobe-
eta bakotxak dauka
miloien balore.
Amama da gurean
poza ta adore,
berak zaintzen dau gure
etxeko umore;
amama da gurean
egiz Miren Lore.

3

Gure amama dago
makal eta zaharra
- hau esan beharra-
baina baita bera da
etxeko izarra.
Menperatuta dauka
larogeita hamarra,
Jaunak jaso deiola
bizitzako marra;
Ai, zein zoragarria
bere irriparra!



4

Gure amama dozu
loretegi fina
ta geldi ezina,
han-hemen zabaltzen dau
Jesusen usaina.
Eten barik bizi dau
maitasun ekina,
bizi-lore bihurtzen
bere hondakina;
horra gure amama
lore erregina.

5

Hau da hau miraria:
azalez zimurra
bihotzez ziburra,
bizi barri bihurtzen
dau barruko lurra.
Amama Miren Lore
maitale samurra,
joango ete jakun
badogu bildurra;
a zelango hutsuna,
ta ez da guzurra!!!.

6

Amama Miren Lorek
danoi lore bana,
bete dau esana,
ahal dauana eginez
emoten dau dana.
Eta jarrai daigula
Miren Loren lana,
eta gaur eskerronez
goazen beragana:
"Miren Lore" guztioi
eskerron laztana.

Aita Martzel